

四庫全書

史部

欽定四庫全書

關中勝蹟圖志卷二十四

陝西巡撫臣畢沅撰

地理

榆林府釋名通志本漢榆溪塞水經注所謂諸次水東
逕榆林塞是也明因塞置衛遂取名焉沿革府志治在
省城北一千三百五十里禹貢雍州之域春秋時翟地
秦為上郡地漢為上郡龜茲奢延西河郡圓陰等縣地

兼置屬國都尉後漢末廢晉義熙中赫連勃勃據地稱
大夏國名其城曰統萬後魏始光四年建為統萬鎮太
和十一年改置夏州兼置化政郡西魏改郡曰宏化隋
開皇初郡廢大業初改夏州為朔方郡唐貞觀二年復
為夏州屬關內道天寶初復改朔方郡乾元初仍曰夏
州貞元三年置夏州節度中和二年賜號定難軍五代
因之宋為西夏地元為綏德州地明成化七年始置榆
林衛為延綏鎮治

本朝雍正八年改置榆林府屬陝西布政使司領縣四曰
榆林神木府谷懷遠州一曰葭州 府城通志即舊衛
城東枕駝山臨黃河明正統初剏築成化九年增築北
城後又拓南城嘉靖隆慶萬厯中相繼甃磚南關外有
外城正德十年築西門外又有羅城隆慶元年築周十
三里三百餘步門七

榆林縣釋名通志縣本榆林堡地義與府同沿革一統
志附郭漢置龜茲縣屬上郡為屬國都尉治後漢因之

晉省後魏為夏州地後周置彌渾戍隋開皇初改德靜鎮大業九年置德靜縣屬朔方郡唐貞觀七年於縣置北開州十三年州廢縣屬夏州五代因之宋沒於西夏元為米脂縣地明永樂初置榆林塞成化七年置榆林衛為延綏鎮治

本朝雍正二年省衛入綏德州八年置榆林縣為榆林府治

神木縣釋名通志元縣名本宋神木寨也郭子章云縣

西十五里楊家城內有神松三株枝柯相連故曰神木沿革縣志治在府東北二百四十里漢惠帝五年置固陰縣屬西河郡後漢因之晉時荒廢後魏置石城縣後周改曰銀城隋屬雕陰郡唐初屬勝州天寶元年分置麟州兼置新秦縣為治其年改新秦郡乾元初復曰麟州屬關內道五代周時屬北漢宋曰麟州新秦郡元豐中於銀城縣界置神木寨政和四年省銀城入新秦縣金時地屬西夏州縣皆廢元初於

神木寨置靈州至元六年廢州為神木縣屬葭州明不改

本朝乾隆元年改屬榆林府 縣城通志明正統中築周四里有奇門四

府谷縣釋名通志唐未置府谷鎮後唐升為縣縣從鎮名也沿革縣志治在府東北二百里漢西河郡地隋唐為銀城縣地後唐置府谷縣兼置府州永安軍節度屬河東路宋崇寧元年改曰靖康軍政和五年賜名榮河

郡金時地屬西夏元初仍曰府州至元六年州廢二十二年縣屬葭州明不改

本朝乾隆元年改屬榆林府 縣城通志明正德中增築因河為池周五里有奇門六

懷遠縣釋名通志本明懷遠堡縣從堡名也沿革一統志治在府西南一百六十里漢置奢延縣屬上郡後漢因之晉省後魏置巖綠縣為夏州及化政郡治西魏為宏化郡治隋為朔方郡治唐貞觀二年改縣曰朔方為

夏州治宋沒於西夏元為米脂縣地明天順中置懷遠堡屬榆林衛

本朝雍正二年改屬綏德州九年置懷遠縣屬榆林府
縣城通志即舊堡城明天順中築萬厯中甃磚周三里有奇門三

葭州釋名通志金州名以州臨葭蘆川也川在州西五里岸多葭蘆故以名州沿革州志治在府東南一百七十里漢西河郡圖陰縣地晉時荒廢西魏置真鄉縣後

周置真鄉郡隋開皇初郡廢屬雕陰郡唐屬銀州宋初屬西夏元豐中收復置葭蘆砦屬石州臨泉縣元符二年以砦置晉寧軍屬河東路金貞元元年屬汾州大定二十二年升為寧晉州二十四年改曰葭州興定二年屬延安府元屬延安路明屬延安府

本朝雍正三年直隸陝西布政使司乾隆元年改屬榆林府州城通志宋熙寧中置葭蘆寨據山為固因河為池至今稱為鐵葭州明洪武初因舊址改建周三里有

奇門二

名山

榆林府駝山在榆林縣城東通志一名東山城半踞其
巔高數十丈俗呼為東山土人多穴山居之山形類駝
鎮之得名駝城以此

紅山在榆林縣北十里通志一名紅石峽山皆紅石地
近沙阜因築紅山墩延綏志山環列若屏障落日照之
如霞起兩崖飛湍電轉紅影外浮昔李繼遷葬其祖障

水別流鑿石為穴既葬復引水其上疑即此中有寺複
道飛簷望之如畫榆柳陰映鳬鷺唼喋榆溪之水所自
出也越榆溪而西為十里河風吹日映色如龍鱗逶迤

十餘里通志水甘草茂明巡撫余子俊築塞堡植柳萬

株其下

明楊守謙遊紅石峽詩倚劍臨榆塞開筵傍斗
城銀川朝氣合金粟暮雲平虎帳倚緹騎龍河

拔漢旌封侯思定
遠投筆魏書生

木礪神山在榆林縣南五十里延綏志明成化時有妖
神棲此立廟祀之後有道士經此書符咒之並焚其祠

崇遂殄息

已上
榆林

木根山在榆林縣北套內晉書載記苻堅建元元年遣
鄧羌討劉衛厄擒之於木根山

馬良山在榆林縣北套內延綏志明嘉靖二十五年套
夷犯保安慶陽諸處總督曾銑遣將李珍搃其巢於馬
良山後即此

陰山在榆林縣北套外續漢書郡國志五原西安陽縣
北有陰山水經注河水又南逕馬陰山西漢書音義曰

陰山在河南謂是山也而實不在河南唐書地理志安

北府北至陰山七十里

謹按唐安北都護府東至榆林二百五十里

涿邪山在榆林縣北套外漢書匈奴傳天漢二年因杆將軍公孫敖出西河與強弩都尉路博德會涿邪山

寘顏山在榆林縣北套外漢書匈奴傳元狩四年衛青出定襄塞千餘里破單于兵至寘顏山趙信城而還

大斤山在榆林縣北套外隋書突厥傳開皇末遣太平公史萬歲出朔州擊突厥達頭於大斤山

燕然山在榆林縣北套外漢書匈奴傳征和二年李廣利出五原乘勝追北至范夫人城又北至郅居水上引還至速邪烏燕然山單于遮擊貳師敗降後漢書竇憲傳永元元年竇憲破北單于於稽落山追至私渠北鞬海遂登燕然山去三千餘里刻石勒功而還

黑山在榆林縣北套外魏書蠕蠕傳神麌二年討蠕蠕帝出東道向黑山長孫翰從西道向大峨山同會賊庭襲之至栗水大檀衆西奔唐書郭知運傳開元四年突

厥降戶叛知運領朔方兵邀擊於黑山呼延谷大破之
鐵山在榆林縣北套外唐書突厥傳貞觀四年李靖出
定襄進屯惡陽嶺夜襲頡利頡利驚退牙碯口走保鐵

山靖復襲擊大破之

已上邊外名
山附見榆林

龍眼山在神木縣東南百步通志上有二穴穿透如龍
眼縣志崦岈突起類龍頭角

香爐山在神木縣東北一里通志明武宗賜名鳳頭山
縣志峰峭如削其頂最圓而稍舒如喙明霞掩映灼灼

生輝東為虎頭山又東北為錦屏山山形峻峭布列如屏洩滄之水遶其下

駝兒山在神木縣西三里通志首尾皆峻中稍低凹儼若駝峰明武宗賜名筆架山

沈家寺山在神木縣西南三十里延綏志山石有巨人跡長尺五寸濶五寸車輞跡一道俗傳周世宗微時憩此又縣西南八十里有點軍崖在柏林堡南相傳秦王過此點軍今有馬蹄及人跪坐衣文在石

白龍寺山在神木縣東南十里通志四面壁立祇通一徑登者拾級聚足以上土人多有結廬而居者又縣東十里有鳳凰石相傳宋時鳳鳴於此

卧牛峰在神木縣東北縣志在永興堡東南十五里夏將訛龐東侵宋將郭恩被執於此

已上神木

跋那山在神木縣北套內魏書蠕蠕傳登國六年討蠕蠕緄紇提西遁魏主追至跋那山緄紇提降緄紇提之子曷多汗棄父西走長孫肥輕騎追至跋那山斬之

骨羅山在神木縣北套內魏書明帝紀永興五年帝西幸五原狩獵於骨羅山

雞秩山在神木縣北套外漢書匈奴傳本始二年祁連將軍田廣明出西河塞千六百里至雞秩山

己上邊外名山附見

神木

五虎山在府谷縣東一里雍勝略五峰雄峙其形如虎延安府志一名五龍山下有香爐山曾有仙人煉丹於此

桃花洞在府谷縣城南通志洞有硃沙艷如桃花又千
佛洞在桃花洞南又懸空洞在縣東門外高踞城巔俯
瞰洪流又洪濟洞在縣小南門外

水塞山在府谷縣北十五里通志兩川夾流山峙川中
龍峰山在府谷縣東北三十里通志山形盤曲紆迴上
有高峰特立樹木陰翳旱禱輒應建有龍王廟

青石崖在府谷縣東北九十里通志在黃甫營北又相

近有竺瑤臺巨石巘屹一名蓮花纏

已上府谷

暖泉峰在府谷縣北套內九域志在豐州西北三十七

里

謹按豐州故城在府谷北百五十里

沙角山在府谷縣北套內三秦記河西有沙角山峰崿
危峻逾於石山其沙粒麓色黃如乾糲又山之陽有泉
名沙井綿歷今古沙不填之人欲入穴即有鼓角之聲
震動人足九域志豐州西五十里至沙井嶺

薛林山在府谷縣北套內魏書明帝本紀後魏泰常四
年帝從君子津西渡大狩於薛林山

拔鄰山在府谷縣北套內魏書太武帝紀始光四年西
討赫連昌濟君子津次拔鄰山榆林衛志山去君子津
二百餘里

石門山在府谷縣北套外漢書匈奴傳太初三年光祿
徐自為出五原塞數百里遠者千里築城障列亭至廬

胸

謹按顏師古曰廬
胸山名也胸音勑

地理志稠陽縣北出石門障得光

祿城水經注石門水出石門山

謹按石門山在
舊臨沃縣境

禹貢錐

指廬胸山謂之光祿塞按元和郡縣志石門障即光祿

城古入匈奴大路

已上邊外名
山附見府谷

狄青原在懷遠縣西南五十里延綏志在威武堡南十里明成化二年總兵楊信破敵於此

橫山在懷遠縣西南接安定縣界縣志宋元豐中种諤上言橫山延袤千里多馬宜稼且有鹽鐵之利其城壘

控險足以守禦即此

已上
懷遠

契吳山在懷遠縣北套內十六國春秋赫連勃勃北遊契吳歎曰美哉臨廣澤而帶清流吾行地多矣自馬嶺

以北大河以南未之有也元和郡縣志山在朔方縣北

七十里

謹按水經注云河水左合契吳山水在定襄桐過之下則山當屬山西境抑或別有一山存以

俟考

木瓜嶺在懷遠縣北套內唐書地理志朔方縣有木瓜嶺

陽山在懷遠縣北套外水經注河水東逕陽山南漢書注曰陽山在河北指此山也又東逕石跡阜西是阜破石之文悉有鹿馬之跡自高闕以東夾山帶河陽山以

西皆北假也禹貢錐指陽山即陰山山在中國極北故名陰山水北曰陽山在河水之北故亦謂之陽山漢書侯應曰北邊塞至遼東外有陰山東西千餘里計陰山綿亘直抵遼東非河南所能容信徐廣之謬

謹按徐廣曰陰山在

河南陽山在河北已上邊外名山附見懷遠

第一峰在葭州北五里通志高出羣峰又有飛來石在州北三里許片石掛於懸崖相傳昔時飛落於此

龍頭岡在葭州東南百步通志岡之東有果老洞層崖

橫出洞臨黃河俗傳果老曾居此相近有香爐石在州
治東麓石笋突出高十餘仞駕木為橋構觀音閣其上
俯臨黃河宛然中流之柱

萬戶峪在葭州北八十里通志宋咸平中啜詵引趙保

吉之衆從此入寇麟州

謹按麟州
今屬神木

古為沃壤谷中有居

民萬家又鳳凰山在萬戶峪東北層巒特出南憑黃河
高數百仞又峪北有獅子石聳峻玲瓏其巔突出石笋
上濶下狹攀援而上可容數十人東臨黃河一名獅撲

石

石鼓崖在葭州北百里漢樓子溝西通志青石一片長丈餘架兩石上又落大石一隙其中形如鼓圈覆青石上擊之其聲如鼓

題詩崖在葭州西北五十里通秦塞葭蘆河西州志巖邊石上有朱字詩二首似古鳥跡體首云深山隱玉樹餘不能辨

塢兒山在葭州西北四十里州志上有小塢在真鄉

川北嘉靖間古囊侵東路至此

西嶺山在葭州西五里葭蘆川傍通志宋將薛義敗夏人於葭蘆西嶺即此又相近有桃李塢在申家灣東遶蘆水西峙石崖清泉盈耳桃李怡目

落珠崖在葭州西七十里五女川西州志石崖壁立亂水噴注如落珠相傳宋兵至此亂箭射石水隨箭鏃迸出土人名曰萬箭崖

嵯峨峰在葭州南三里許通志崔嵬巨石立南山之崖

若蹲踞然其下為龍虎灣在州南舊城下其南山下有石長十餘丈橫峙葭蘆河中形若卧龍水為所障折而北流其北當水之衝有一石踞坐如虎其水至此轉而東流遶龍之右東出

白雲山在葭州東南五里州志峰頂常有白雲繚繞因名為一州勝境

鞦韆塢在葭州東北百里雍勝略有大樹植兩山之巔其下為大道行者望之若鞦韆架故名

己上
葭州

大川

榆林府葭蘆川在榆林縣東又東南流入葭州界通志
即諸次水今名沙河山海經諸次之山諸次之水出焉
而東流注於河水經注水出上郡諸次山東流逕榆林
塞即漢書所謂榆溪舊塞也其水東入長城小榆林水
合焉歷澗西北窮谷其源也又東合首積水水西出首
積溪東注諸次水又東入河延綏志沙河源出雙山堡
西北即真鄉之葭蘆河也南合堡東宋家河又南合謝

家莊車道溝水又南至投河合關家川水過柳樹會又

南合真鄉水抵通秦寨流石峽中合五女川為葭蘆河

至葭州城南入黃河

謹按真鄉縣舊屬葭州柳樹會在葭州西北一百里

無定河在榆林縣西南通志自懷遠界來逕魚河堡與

西河合又東南入米脂界水經注奢延水又東逕膚施

縣合帝原水又逕膚施縣南

謹按漢膚施縣今屬綏德州

西河在榆林縣北十里通志即帝原水亦名明堂川漢

書地理志膚施縣有帝原水水經注帝原水西北出龜

茲縣東南流注奢延水

謹按迤茲故城在縣北

延綏志西河在鎮

城西即榆溪源出塞外葫蘆海南流入紅石峽水自石

崖流下陡落數千仞匝隍塹於城西遂為西河南流至

鎮川堡入無定河

謹按水經注諸次水即榆溪延綏志又謂西河為榆溪或又以沙河至葭

州入河者為諸次水以西河至魚河堡入無定河者為帝原川與延綏志異而與酈氏水道合從之

龍王泉水在榆林縣城中延綏志一名南門河一名南

泉自山半湧出匯而為池疏而為竇周灌城中鎮人所

汲養也嚴冬蓊勃水氣如蒸西南入西河

柳河在榆林縣西南十五里延綏志源自西南入西河長湖數頃其地可耕成化中植柳數千株萬厯中斬伐殆盡

楊官海在榆林縣西二十里延綏志凡水之所會渟而不流者邊人通謂之海水不大而海之者渟之盛也楊官海又西十里曰方家海又西十里曰酸梨海又稍南曰天鵝海

已上榆林

黃河在榆林府北塞外自延安府界流來又東南入府

谷界水經注河水自臨河縣故城北又東逕陽山南又

東流逕石跡阜西又南屈逕河目縣

謹按河目故城在北假中屬勝州銀

城縣在今懷遠縣西北

又南合南河上承西河東逕臨戎縣故城

北又東逕臨河縣南又東逕廣牧縣故城北經流二百

里許東會於河

謹按廣牧屬朔方郡即豐州也在今懷遠縣北

河水又南逕馬

陰山西又東南逕朔方縣故城東北

謹按什貢故城即漢朔方縣在今懷

遠縣北又東轉逕渠搜縣故城北

謹按渠搜縣在廢夏州北今榆林府西北又

東逕西安陽故城南

謹按西安陽縣屬五原郡在廢豐州東北今榆林府西北

又東

逕田辟城南

謹按田辟地名屬五原郡

又東逕成宜縣故城南

謹按成宜

縣在廢豐州界今榆林府北

又東逕原亭城南

謹按原亭亦地名屬五原郡

又東

逕宜梁縣故城南

謹按宜梁縣在五原西南六十里廢豐州東今榆林府北

又東逕

柰陽城南河陰縣故城北

謹按柰陽屬東郡都尉治河陰縣屬五原郡俱在今神木

縣北又東逕九原郡故城南

謹按秦置九原郡漢更名五原在今神木縣北

又東

過臨沃縣南

謹按臨沃縣屬五原在今府谷縣北

又東枝津出焉又東流

石門水南注之又東逕柰陽故城南

謹按柰陽縣在廢勝州西南今府谷

縣東北

又東南枝津注焉水上承大河於臨沃縣東流七

十里注於河河水又東逕塞泉城南而東注又東過雲

中楨陵縣南又東過沙南縣北從縣東屈南過沙陵縣

西謹按楨陵縣即廢東勝州沙陵漢屬雲中郡並在河東岸今屬山西沙南縣在河西今府谷縣東北河

水屈而流白渠水注之又南逕赤城東又南過定襄桐

過縣西河水於二縣之間濟有君子之名謹按定襄桐過並在河東

岸屬山西河水又東南左合契吳山水樹頽水大羅水謹按諸水

皆在山西又右得湍水口又南過西河囿陽縣榆林衛舊志

黃河在衛北千里自寧夏衛橫城堡西折而北過平寇

城東百餘里又東北流過古豐州西北折而東經三受降城南至廢東勝州西折而南入府谷縣黃甫川東九里其中謂之河套周圍數千里

諾水在榆林府北套外通志一名諾真水漢書匈奴傳元帝初元初都尉韓昌光祿大夫張猛使匈奴與單于登諾水東山刑白馬為盟顏師古注諾水即今突厥地諾真水也

鹿渾海在榆林府北套外魏書道武帝紀登國五年西

征次鹿海襲高車袁紇部八年西征侯呂鄰部至苦水
皆大破之

鴈鶉泉在榆林府北套外唐中受降城北唐書回紇傳
貞觀中以回紇歸附詔於磧南鴈鶉泉之陽置郵

額根河在榆林府北套外魏書蠕蠕傳太平真君四年
討蠕蠕帝出中道至鹿渾谷與賊相遇吳提遁走追至
額根河破之車駕至石水而還

粟水在榆林府北套外魏書蠕蠕傳神麇二年討蠕蠕

出黑山次於沙漠南輕騎至粟水大檀西奔帝緣粟水
西行過寶憲故壘次於菟園水去平城三千七百里

已上

邊外大川
附見榆林

黃河在神木縣東百二十里自府谷界流入與山西興
縣分界又南入葭州界水經注河水又南過西河圖陽

縣東

謹按圖陽故
城在縣東

元和郡縣志麟州東至嵐州界黃河

一百二十里

謹按麟州故城在縣北嵐
州即今岢嵐州在山西

通志自府谷縣

盤塘南六十里沿河府神二境相雜至沙峁頭入本境

屈野河入焉又南流二十里至棗塔溝入葭州界

屈野河在神木縣城西百步東南流入黃河宋史麟州
西城枕睥睨曰紅樓下瞰屈野河縣志源出塞地五蘭
峁兒遶筆架山之陽至縣南一百二十里沙峁頭入黃
河

老龍泉水在神木縣西北十五里通志樹林陰翳泉水
清漪有龍神祠旱禱輒應其水入屈野河

柴溝在神木縣西通志明天順二年孛來入寇神木總

兵張斂敗之於柴溝即此

駱駝堰在神木縣西北百里一統志唐張說追党項經

此

已上
神木

大葭蘆水小葭蘆水在神木縣北套內元和郡縣志大

葭蘆水在榆林縣西二百二十里小葭蘆水在縣西二

百四十里地甚良沃

謹按唐榆林即勝
州治在府谷縣北

滴水在神木縣北套內水經注滴水出美稷縣

謹按美
稷屬西

河東南流俗亦謂之湍波水東南流入長城東鹹水出

長城西鹹谷東入湍水湍水又東渾波水出西北窮谷東南流注湍水湍水又東逕西河富昌縣故城南又東

流入河

謹按富昌故城在勝州南已上邊外大川附見神木

黃河在府谷縣東三十步東南正南至河皆一百步自

塞外流入又南入神木界水經注河水自君子濟又南

右得湍水口又南至固陽

謹按湍水在縣東北邊外

通志自蓮花纏

入境為唐家匯渡流六十里至楊家川口黃甫川水入焉又十里至沙窰子清水川入焉又南二十里為天橋

又三十里逕縣城東南孤山川入焉又百五十里至盤塘渡

清水川在府谷縣東北五十里自西北沙漠界流入東南注於河通志邊方士騎賴以汲飲又縣東北六十里有黃甫川自塞外牛武城南逕黃甫營邊牆入口南流入於河九股水在府谷縣西南通志一名孤山水源出草地九源並導合為一流東南流入邊牆逕鎮羌堡東孤山堡西又東南流三十里入黃河

石馬川在府谷縣西三十里通志相傳有石馬至其處

今馬跡猶存

已上府谷

虎澤在府谷縣北套內通志即武澤漢書地理志西河

郡穀羅縣武澤在西北後漢書梁懂傳永初三年南單

于圍中郎將耿种於美稷明年度遼將軍梁懂赴救至

屬國故城與戰破之單于引還虎澤懂又與种進攻虎

澤單于乞降

謹按上林賦紫淵經其北文穎曰穀羅縣西北有紫澤則虎澤又即紫澤也

已上

邊外大川

附見府谷

無定河在懷遠縣北通志即生水俗名滉忽都河晉書
載記赫連勃勃於朔方水北黑水之南營都城水經注
奢延水西出奢延縣西南赤沙阜山海經所謂生水出
孟山者也俗謂之奢延水又謂之朔水東北流逕其縣
故城南又東北與溫泉合又東黑水入焉又東合交蘭
水與鏡波水合

謹按奢延故
城在縣西北

元和郡縣志朔方縣無定

河一名奢延水源出縣南百步

謹按唐朔方
故城在縣北

延綏志滉

忽都河出龍州堡南宜家畔合城北烏龍洞泉及城西

水東流四十里清平水北注之又東柳泉兒水北注之
又東狄青原水北注之又過響鈴塔威武堡暗門水出
其東又海棠河及東西二河俱出鎮靖堡塞外東流注
之又東過懷遠堡苦水川合圍川會之為無定河至波
羅堡北折而南流黑木頭水鮑家寺水東注之又過響
水堡東入榆林界其圍水出清平堡外白城兒東流合
夏河兒入波羅堡與滉忽都河會

臣謹按圍水在葭州今名禿尾河其以奢延水為圍

水誤自歐陽志輿地廣記始前明人地志往往承之
近時譚吉璵撰延綏鎮志亦不知辨但此出清平堡
外之水本無他名今仍其文而辨正之如此

石窯川在懷遠縣北通志即黑水晉書載記赫連勃勃
於黑水之南營都城水經注黑水出奢延縣黑澗東南
歷沙陵注奢延水元和郡縣志烏水出朔方縣烏澗本
名黑水避周太祖諱改名縣志石窯川在威武堡北塞
外東南流逕懷遠堡為亂窯川河又有打狼河自塞外

南流逕堡東入焉又東南逕波羅堡入滉忽都河

謹按石窰

川打狼河諸水俱自邊外流入

黑木頭溝河在懷遠縣東南四十里一統志源出威武堡鄧家塢王家塢東流合鮑家寺水至響水堡入無定

河

謹按此疑即交蘭水

大理河在懷遠縣東南百五十里通志自清平堡東流合小理河逕縣境一百里入綏德州界又小理河在縣東南百二十里源出清平堡東老虎塢東流至巡檢司

溝合於大理河迤縣境六十里

已上
懷遠

橫水在懷遠縣北套內古朔方縣南唐書地理志橫水
五十九里至什賁故城回紇傳會昌二年回鶻烏介可
汗入雲朔剽橫水殺掠甚衆

鹽澤在懷遠縣北套內水經注朔方縣有二鹽池其鹽
大而青白青者名曰青鹽一名戎鹽入藥分唐書地理
志金連鹽澤青鹽澤皆在朔方縣南元和郡縣志鹽澤
在什賁城西南延綏志朔方縣南有蓮花城紅鹽池在

其東長鹽池在其西

地斤澤安慶澤在懷遠縣北套內宋史夏國傳太平興國七年李繼捧入朝其族弟繼遷自銀州奔入地斤澤澤距夏州東北三百里又淳化初繼遷與繼捧戰於安慶澤

余吾水在懷遠縣北套外山海經北鮮之山鮮水出焉北流注余吾水漢書匈奴傳天漢四年貳師將軍李廣利出朔方匈奴聞之悉遷其累重於余吾水北單于自

率衆待水南接戰連日引還

已上邊外大川附見懷遠

黃河在葭州東一里自神木界流入與山西興縣臨縣分界又南入吳堡界水經注河水南逕圓陽縣圓水東注之又南端水入焉水西出虢山東流注於河河水又南諸次之水入焉又南湯水注之山海經曰上申之山湯水出焉東流注於河州志自神木界沙峁頭入州境東流南折至螭蚓峪入吳堡界沿歷二百里

彌勒河在葭州北七十里自神木界屈家南溝歷彌川

寨至州北萬戶峪東入黃河延綏志在高家堡南宋置
彌勒砦

秃尾河在葭州東北五十里自邊外流入又東入河漢
書地理志上郡白土縣固水出縣西東入河

謹按固音銀白土縣

今屬邊外水經注固水出上郡白土縣固谷東逕其縣南東

至長城與神御水合水出縣南御山峽東出至長城入
於固水又東逕鴻門縣又東梁水注之水出西北梁
谷東南流注固水又東逕固陰縣北又東桑谷水注之

水出西北桑溪東南流入圓水圓水又東逕圓陰縣南

東注于河

謹按鴻門圓陰故城並在州西北

隋書地理志開光縣有圓

水

謹按開光故城在州北即漢固縣地

州志自建安堡塞外擡甕山分流

一為蘓麻河一為惡水河又東逕高家堡北栢林永利

水入焉又南蒞藜川入焉又南三十里至虎頭峯西開

光川入焉東以兩山約流二百餘里至州東北入黃河

臣

謹按唐地理志云銀州東北無定河即圓水而後

人遂皆謂奢延水為圓水然考水經注圓水在東北

奢延水在西南各自入河源流迴別故有謂禿尾河
即固水者揆之漢魏地理郡邑方位皆相脗合當非
臆斷從之

永利河在葭州北百七十里自神木縣界流逕高家堡
西北入禿尾河通志即水經注之神御水

詳見
神木

開光川在葭州北百里通志以故縣得名俗訛為開荒
川州志發源州北百二十里黑龍潭流五十里至三角
城虎頭峁東入禿尾河即後魏開光郡也宋時李繼隆

軍出開光谷西杏子坪即此

謹按開光川當即水經注之梁水

又寧河

在州東北四十里發源州北八十里王元溝南與寧河

寨水合歷山谷中行四十里至州東北入黃河

謹按寧河疑即

水經注之端水

葭蘆川在葭州西五里自榆林界流入又東南入黃河

元和郡縣志真鄉縣有葭蘆水源出縣西北

謹按真鄉故城在州

西北詳見榆林

真鄉川在葭州西百里通志即古真鄉郡也今訛為丁

香川一名明堂川源自沙漠流來下合葭蘆川

謹按榆林之西

河亦名明堂川
與此非一水也

五女川在葭州西北十里源出州西落珠崖東入葭蘆河延綏志以有五女墓名

黑水坑水在葭州南八十里州志源出米脂縣桃花峁其色如墨至州南八十里荷葉坪東入黃河又烏龍河在州南二十里發源州西劉世材溝至州南峪口東入

黃河

謹按水經注之湯水當即烏龍黑水諸水然無明証存考

鹽溝在葭州北八十里延安府志地出鹽泥東距黃河西抵沙漠為州北要區

虎峪溝在葭州北百七十里高家堡西州志黃河四圍突出山石一片左右青泉數處環繞城西花木翳翳頗稱勝槩

月賓泉在葭州北郭外迤西一里通志泉自半山石罅出清冽而甘一名官泉

已上葭州

古蹟 第宅

榆林府唐幽陵都督府通志在神木縣城西九十里開元中置

石晉折氏圃府谷縣志在縣治內石晉後折氏世為府州刺史創百花塢於郡圃為一方之勝

古蹟

祠宇

漢火井祠一統志在神木縣西南漢書地理志西河郡鴻門縣有天封苑火井祠火從地出

謹按鴻門廢縣在神木縣西南

明余肅敏祠一統志在榆林縣南門外祀延綏巡撫余

子俊

姜愍忠祠一統志在榆林縣治內祀寧夏總兵官姜漢

古蹟

郊邑

秦長城榆林縣志在縣西水經注諸次水東入長城又走馬水東北入長城注奢延水元和郡縣志秦長城在

德靜縣西二里寧朔縣北十里

謹按德靜廢縣在榆林縣西寧朔廢縣在榆林

縣南唐李益登長城詩漢家今上郡秦塞古長城有日雲長慘無風沙自驚當今聖天子不戰四夷平

榆溪塞輿地廣記在榆林縣南史記趙世家武靈王二

十年西略地至榆中並河以東屬之陰山城河上為塞
項羽本紀蒙恬北逐戎人開榆中地數千里正義蘓林
曰在上郡崔浩曰蒙恬樹榆為塞也水經注諸次水東
逕榆林塞世謂之榆林山即漢書所謂榆溪舊塞自溪
西去悉榆林之藪矣緣歷沙陵屈龜茲縣西出故謂之
廣長榆也元和郡縣志榆林關在榆林縣東三十里東
北臨河秦却匈奴之處隋置榆林關

晉吳兒堡寨通志在神木縣西南五十里赫連勃勃破

義真於長安遷其人築此以居之因名

統萬城一統志在懷遠縣西晉書載記義熙中赫連勃勃自稱大夏於朔方水北黑水之南營起都城自言方統一天下君臨萬邦可以統萬為名蒸土築城錐入一寸即殺築者而再築之名其南門曰朝宋東門曰招魏西門曰服涼北門曰平朔北史魏太武始光四年西伐赫連昌剋其城城高十仞基厚三十步上廣十步宮牆五仞其堅可以礪刀斧元和郡縣志其城土色白而牢

固有九敵樓峻險非人力可攻縣冊即夏州故城

赫連勃勃墓一統志在懷遠縣西元和郡縣志在朔方
縣西十五里隋置白城鎮後廢十六國春秋夏錄勃勃
葬嘉平陵

臣謹按陝西通志膚施縣南杜甫川有赫連勃勃墓
太平寰宇記又云勃勃墓在霍山最高峯與此為三
今考懷遠本後魏夏州唐為朔方縣李吉甫撰元和
郡縣志距勃勃葬時較近記載當屬有徵故一統志

引以為據今從之

唐石堡城一統志在榆林縣南武德初延州總管段德操擊梁師都石堡城三年師都石堡留守張舉來降宋元豐四年克米脂進攻銀石二州破石堡城遂追至夏州皆即此

靜羌寨通志在神木縣東南一百里唐建

烏延城一統志在懷遠縣南唐書地理志朔方縣長慶四年節度使李佑築烏延宥州臨塞陰河陶子等城於

蘆子關北以護塞外宋史夏國傳元豐五年沈括請城古烏延城以包橫山使夏人不得絕沙漠

宋碎金故鎮一統志在榆林縣南一百三十里宋史康定初黃德和以二千人屯碎金谷即此

李彛昌墓通志在榆林縣北十里紅石峽世傳墓在水
中石穴又縣西南十里王墓山有斷碑字已磨滅相傳
為元昊祖墓

折克行墓通志在府谷縣北三十里李家窪又縣西四

十里有折太君墓克行之母也

元察罕諾爾城一統志在懷遠縣北元世祖十七年作行宮於察罕諾爾築土為牆明洪武四年湯和攻察罕諾爾擒猛將虎臣永樂中總兵柳升請修察罕諾爾城景泰中石亨請移寧塞堡於此不果

五女墓通志在葭州西七十里五女川元時州民無子生五女父死誓不嫁以養母卒葬於此

明邊牆榆林府志在府北成化八年余子俊勦築東起

清水營西抵花馬池延袤千七百七十餘里皆鑿崖築牆掘塹其下連續不絕每二三里置敵臺烽砦為巡警之所後以屯田多在邊外於是修築大邊防護屯田而以所築者為二邊

紅山市一統志在榆林縣北十里嘉靖中與套夷互市於花馬池隆慶五年濟囊乞貢復請開市因立市於此常樂堡一統志在榆林縣東三十里其地名岔河成化中於今堡南二十里創築後因其地沙積無水徙建於

此城在平川為極衝中地又雙山堡在縣東少南七十里隋唐真鄉縣地明正統二年築成化中移築今堡城在山岡為極衝中地

歸德堡一統志在榆林縣南四十里成化中置為腹裏中地又思河堡在縣南八十里唐銀州地本名黑土圪塔正統二年置思河砦於九股水成化十一年移置今所城在半山為腹裏上地又鎮川堡在縣南一百四十里嘉靖二十九年建

保寧堡一統志在榆林縣西三十里舊名古梁城嘉靖四十三年增建城在平地為極衝下地

款貢城一統志在榆林縣北紅山上中有鎮北臺易馬臺俱萬歷五年築又有筆架城在縣西北嘉靖四十五年套夷陷此

柏林堡一統志在神木縣西南六十里成化初置城在山原又大柏油堡在縣西三十里城在山上

永興堡一統志在神木縣東北六十里地名黑城兒成

化中置城在山上

楊家城一統志在神木縣西北正統五年副都御史陳
鑑移縣於楊家城後以在山巔不便仍復故處

清水營堡一統志在府谷縣東北六十里成化中置城
在山坡又黃甫川堡在縣東北七十里天順中置城在
山畔西北就山東南臨川

孤山堡一統志在府谷縣西北四十里本孤圪塔馬營
正統中置在西山成化初移置城在山畔又鎮羌堡在

縣西北八十里明初置在東村成化二年改建城在山

原

明楊一清孤山堡詩簇簇青山隱成樓覽時登眺使人愁西風畫角孤城曉落日晴沙萬里秋甲士解鞍

休戰馬農兒持券買耕牛回思未築邊牆日曾得清平似此不

木瓜園堡一統志在府谷縣北五十里即明初木瓜園寨成化十六年改置堡城在山上

三捷關一統志在懷遠縣東二十里衆山環列中通一道頗稱險要

波羅堡一統志在懷遠縣東少北四十里正統十年置

以有波羅寺因名城在山畔為極衝中地又響水堡在縣東八十里正統二年置成化二年移出黑河山易名平夷堡九年復還響水城在山坡為極衝中地

威武堡一統志在懷遠縣西南四十里地名響鈴塔成化五年置城在山阜為極衝上地又清平堡在縣西南八十里舊名磚兒營成化初置城在山原為極衝中地響水石橋府志在懷遠縣響水堡南滉忽都河上又有下響水橋河廣半里水從崖落成化中有僧從水底鑿

三窟河流頽疊而下其上為石梁今兩旁窟俱壞中一窟猶存

建安堡一統志在州北一百五十里地名崖寺子成化十年增置城在山畔又高家堡在州北一百六十里地名飛鴉川正統四年建城在平川

梁震墓通志在神木縣南十里

關中勝蹟圖志卷二十四

欽定四庫全書

史部

關中勝蹟圖志卷二十八至

詳校官太僕寺少卿_臣李廷欽

編修_臣程嘉謨覆勘

總校官進士_臣朱鈐

校對官中書_臣雷純

謄錄監生_臣元章成

欽定四庫全書

關中勝蹟圖志卷二十五

陝西巡撫臣畢沅撰

地理

商州釋名通志商本山名在州東南故名又周秦為商
于地故漢以名縣後周以名州沿革一統志治在省城
東南三百里禹貢梁州之域春秋晉上洛邑戰國屬秦
漢置上洛縣謹按秦為衛鞅
邑漢又置商縣後漢為上雒侯國三國屬

魏晉置上洛郡後魏改曰洛州後周改曰商州隋改州
為上洛郡唐武德元年復曰商州天寶元年曰上洛郡
乾元元年復為商州屬山南西道後隸京畿宋曰商州
上洛郡屬永興軍路謹按文獻通考紹興十二年
金割商州之半存上津豐陽金初
屬京兆府路元光二年改屬河南路元省上洛縣入州
屬奉元路明洪武七年降州為商縣屬華州成化十三
年復升為州屬西安府

本朝雍正三年直隸陝西布政使司領縣四曰鎮安雒南

山陽商南 州城南臨丹江元至元中葉明成化嘉靖
間甃甃周五里有奇門四

鎮安縣釋名通志郭子章云縣南門外有鎮安河蓋縣
因水名也沿革一統志治在州西南三百四十里漢漢
中郡旬陽縣地晉以後為豐陽縣地唐萬歲通天元年
析置安業縣屬商州乾元元年改曰乾元縣五代漢乾
祐二年改曰乾祐縣宋因之金省入咸寧縣元至元二
十九年復置乾祐縣三十一年廢明景泰三年始置鎮

安縣屬西安府成化十三年改屬商州

本朝因之 縣城北倚山明景泰三年建正德七年甃以
甃周四里有奇門三

雒南縣釋名通志以在洛水之南故名明以光宗諱改
洛為雒沿革一統志治在州北少東九十里漢上洛縣
地晉太和三年置拒陽縣屬上洛郡尋廢後魏復置仍
屬上洛郡後周置拒陽郡隋開皇初郡廢改縣曰洛南
屬商州大業初屬上洛郡唐屬商州宋金元因之明洪

武七年改屬華州成化十三年復屬商州

本朝因之 縣城北近山南臨水金興定二年築明嘉靖
十三年斃石周三里有奇門三

山陽縣釋名通志以在北山之南豐水之北故名沿革
一統志治在州南少東一百二十里漢商縣地晉泰始
三年析置豐陽縣屬上洛郡後廢後魏太安二年復置
尋又廢後周仍置豐陽縣隋屬上洛郡唐屬商州宋紹
興十三年改屬金州金貞元二年省入上洛縣明成化

十三年始置山陽縣屬商州

本朝因之 縣城明成化十三年築正德三年甃甃周二
里有奇門三

商南縣釋名通志本後魏南商縣地成化間置縣曰商
南以縣在商州之南也沿革一統志治在州東少南二
百五十里漢商縣地隋以後為商洛縣地金為上洛縣
地元為商州地明初為商縣地成化十三年析置商南
縣屬商州

本朝因之 縣城明成化十三年築嘉靖二年拓其西萬
歷七年甃以甃周三里門四

名山

商州金鳳山在州北里許通志一名鳳凰山州之主山
也其西二里許曰鳳凰原

安山在商州北五十五里通志即清池山下有紫榆澗
清池水出焉水經注清池水東北出清池山

輞峪嶺在商州北八十里通志嶺之下道出華州相近

有藥子嶺

馬脚山在商州北百里通志一名小華山山石壁立四面如削巖下一穴上出約七八丈登者以木攀援而上出穴口上有兩峰峽中細水下瀉樹多松栢櫟栗奇險天設昔人多避兵於此

霍家洞在商州西北二十里通志由胭脂關北三里許河東岸一山突起西向一穴有井深丈餘踰井而過寬若數間屋中有石徑不盈尺行百餘步一穴向下以木

梯度之左右前後巖穴可棲者數十百處

冢嶺山在商州西北百二十里漢書地理志上雒縣禹

貢洛水出冢嶺山

謹按上洛故縣即今州治

山海經謹舉之山洛水

出焉陸澄曰冢嶺山即謹舉也

謹按禹貢雒指漢志云上雒縣謹舉山在東北

謹舉疑是謹舉之誤字形相似也

水經注丹水出上雒縣西北冢嶺山

名高猪山一統志商州西北諸山皆秦嶺也甲水出其

南丹水出其東南洛水出其東北後人因分為謹舉冢

嶺等名其實本一山也

又見雒南縣

西巖山在商州西十里通志與仙娥峰對其麓有西巖洞古稱棲真之地

仙娥峰一名吸秀山亂山中特起一峰下臨丹江謂之

仙娥洞

唐白居易仙娥峯詩我為東南行始登商山道商山無數峯最愛仙娥好參差樹若挿匝雲

如抱渴望寒玉泉香聞紫芝草青崖屏削碧白石床鋪縞向無如此物安足留四皓感彼私自問歸山何不早可能塵土中還隨衆人老

熊耳山在商州西四十里隋書地理志上洛縣有熊耳

山州志兩峰插漢以形似名

謹按此非禹貢導洛之熊耳辨見洛南縣宋邵雍辨

熊耳詩昔禹別九州導洛自熊耳熊耳自有兩未審孰為是東者近成周西者隔丹水書傳稱上洛斯言得之矣

白龍洞在商州西九十里接藍田界通志在紅崖寨山中洞口如甕燃炬而進膝行里許有石室一區後壁一池如斗大禱雨輒應雖盛暑而寒如冬

秦嶺在商州西百里通志朝陽洞玉皇洞雷神洞並在其後又其下有黑龍峪相傳漢高祖入關分二道一出藍田一由此漢書地理志上洛縣甲水出秦嶺山三秦

記東西亘八百里嶺根水北流入渭號為八百秦川亦
即丹水所出

高車山在商州西南五里水經注楚水東逕高車嶺南
太平寰宇記上有四皓祠漢惠帝所立高后使張良以
駟馬高車迎四皓於此故名通志一作膏車宋王禹偁
詩云南過膏車嶺川源似掌平州志山在乳水北岸兩
峰如駝俗名駝峰土中常得矢鏃蓋古屯兵處

秦望山在商州西南九十里通志即良餘山俗訛為秦

王山山海經良餘之山乳水出於其陽西安府志山西
南有花水峰亦四皓隱處

南秦嶺在商州南二里通志過嶺為南秦川宋邵雍寓此
天柱山在商州南五里通志宋邵雍愛此山因卜居
於此

樓山在商州南五十里通志其北有劉嶺一名流嶺為
唐高太素隱居舊有澄心亭積翠樓凝碧池六逍遙館
今皆蕪廢又西南有桐谷鶯川

高碛山在商州南八十里雍大記深溝陡澗巨石壁立如門中穿行路澗上高崖萬仞插天下極幽險

諸天洞在商州東四十五里通志怪石壁立中有水清甘可飲仰蔭飛巖俯臨丹水

燕子山在商州東五十里通志上有龕高百尺兩山相合昔土人傍山鑿碛可容六十餘戶以元鳥冬多蟄此又名燕子龕迤南百餘步為鵬崖山兩山壁立高數百仞鑿石為路路絕處懸梯以躋約百丈得巖穴亦可容

五十戶

棣花山在商州東七十里通志以地多棣花而名有東
陽洞相近又有羅漢洞丹崖壁立高數十丈下臨丹水
又有老君峪俗傳為老子騎青牛過此有路通維南

商山在商州東八十里戰國策蘓秦說韓宣惠王曰西
有商坂之塞史記正義商坂即商山在商洛縣南一里
帝王世紀南山曰商山又名地肺山亦名楚山雲笈七
籤一名商谷山四皓仙人隱處名山記一名商洛山後

人名四皓隱處為智亭山通鑑地理通釋七盤十二緝
即商山嶺也雍勝略商山形如商字湯以為國號郡以
為名州志自乳水之南皆曰楚山自劉峪口以下丹水

之南山亦皆曰楚山

唐溫庭筠商山早行詩晨起動征鐸客行悲故鄉雞聲茅店月人跡

板橋霜樹葉落山路枳花明驛牆因思杜陵夢是雁滿
迴塘王貞白商山詩商山名利路夜亦有人行四皓卧
雲處千秋疊蘚生晝燒籠澗黑殘雪
隔林明我待酬恩了來聽水石聲

雞冠山在商州東百里通志峰巒攢簇為龍駒寨主山
山有紫陽洞真人張伯端修煉處

伯牙山在商州東百里通志聳拔紆折俗呼為白鷗山
相傳有樵子刈薪其上隱隱聞琴絲聲尋之不得明末
有好事者陟山巔得斷碣於敗葉中鐫伯牙二字大如
斗意伯牙昔常遊此而後人因以名其山歟

資峪嶺在商州東一百十五里左傳哀公四年楚人臨
上洛左師軍於菟和杜注山在上洛縣東後漢郡國志
上洛縣有菟和山水經注丹水自蒼野東歷菟和山州
志資峪嶺即菟和山或曰資峪菟和之南嶺也

武關山在商州東百八十里通志即少習山左傳楚左
司馬使謂陰地大夫士蔑曰晉楚之盟好惡同之不然
將通於少習以聽命杜注少習商縣武關也

謹按商縣
故城在州

東州志山道險阨北接高山南臨絕壑為自楚入秦要
隘

東巖山在商州東北三里通志有大小趙峪循峪而入
有山曰東巖以對仙娥溪北之西巖而名有水曰東溪
相傳為唐李白僑寓處

困石山在商州東北十五里通志盤曲如困巖阿深邃
為昔人隱逸之地

石龍洞在商州東北四十里通志由十九河溯流而上
有山嵯峨下嵌一洞方廣約五六丈中有石龍十數鱗
角爪牙宛出人工有伏而寢者偃而舒者俯而飲者仰
而吸者鬥者舞者蟠曲似蟄者獨一龍昂首欲飛口中
有液滴成小湫每禱雨以瓶承領下但得一滴瓶即滿
行不數里輒大雷雨否則終日不獲一滴蓋視人意之

虔否也

已上
商州

對峰在鎮安縣北六十里通志兩峰聳峙下有洞相傳
明代中葉吼聲三日忽劃為兩中有神水祈雨輒應
天書山在鎮安縣北八十里通志宋真宗時知永興軍
寇準得天書於乾祐山中即此

旬山在鎮安縣西北水經注旬水出旬山

聖燈崖在鎮安縣西三十里通志在雲蓋寺側相傳每
良夜輒見一燈出崖畔俄散為七八既復合為一又縣

西三十五里有白侍郎洞相傳白居易賈島遊此

北陽山在鎮安縣東南百五十里通志內有石洞與楚之上津接界又相近有南陽山相傳漢張良寓此中有子房洞

石壁嶺在鎮安縣東北五里通志形勢峭立下有魚洞通乾祐河其深莫測洞口流泉噴薄每歲霜降游魚泝流入洞穀雨後水發魚逐隊出居人截洞口得之其味

頗佳擬諸丙穴云

已上
鎮安

冢嶺山在雒南縣西北八十五里通志亦名秦嶺山縣志秦嶺在縣北橫亘三百里自峽山入縣界則名秦嶺陰即太華稍東即潼關重峰疊嶂自縣西抵北而東為洛水發源處即冢嶺山矣

燕子山在雒南縣西北通志縣址枕其上山勢壁立環繞而西與梁原山岡隴相接即梁原之首也又梁原山在縣城西諸山多怪石不堪耕治獨此山可田

書堂山在雒南縣北二十里一統志邑之主峰俯視羣

山環向若揖山後有二洞昔有逐鹿者至此聞其中有書聲故名通志相傳張良從赤松子隱於此

黃龍山在雒南縣北九十里一統志山頂有礦洞明嘉靖八年填塞洞口多五色石中有路通華州太平寰宇記大谷龍龕山在縣東北八十里北接秦嶺多出鉄金疑即此

陽虛山在雒南縣西北百里雍勝略古云蒼頡造書於此山海經陽虛之山臨於元扈之水水經注河圖玉版

曰蒼頡為帝南巡登陽虛之山臨於元扈洛汭之水靈
龜負書丹甲青文以授之隋書地理志洛南縣有陽靈
山

謹按陽靈即
陽虛之訖

通志山前有黑潭潭上有古字不可辨

縣志陽虛山在洛水北

元扈山在雒南縣西北百里山海經鹿蹄之山至於元
扈之山凡九山水經注元扈通於謹舉為九山之次故
山海經曰此二山者洛間也黃帝錄帝在元扈閣上與
大司馬容光左右輔周昌等百二十人臨之鳳銜圖至

帝前黃玉為匣路史元扈者石室也臨洛水今商之上洛南有元扈山縣志山在洛水南與陽虛對峙

藥子嶺在雒南縣西南二十里通志與商州分界舊傳唐真人韋善俊種藥於此

龍山在雒南縣南十里通志山之東有希夷洞亦名藏修洞相傳為宋陳搏隱處有石牀石枕遺跡

中幹山在雒南縣南五十里通志由冢嶺發脉蜿蜒南繞盡縣之境高與秦嶺埒俗名為莽嶺

卷二十五
三要山在雒南縣東南六十里通志南出青草河可通武關東出即盧氏之孔道北望閭鄉靈寶皆有捷徑因名三要水經注要水出三要山

王喬山在雒南縣東南百里通志相傳仙人王子喬隱於此

熊耳山在雒南縣東南百二十里書禹貢導洛自熊耳漢書地理志上雒縣有熊耳山水經注洛水又東逕熊耳山北通志山在縣東商虢分壤之處洛水至此始大

故禹導洛始此

臣謹按熊耳山有四一在河南宜陽縣水經注洛水東北過宜陽縣南水北有熊耳山雙巒競舉狀同熊耳昔光武破赤眉積甲仗與熊耳齊是也一在河南陝州唐書地理志虢州湖城縣有熊耳山今在陝州東百五十里達磨葬處是也一在商州拓地志熊耳山在上洛縣西四十里商州志丹水經此謂之麻澗是也一在雒南縣與盧氏縣接境水經注洛水自熊

耳山北又東逕盧氏縣南又漢書地理志盧氏縣熊耳山是也四山惟在雒南者乃禹貢導洛之熊耳然前人傳記岐誤頗多孔安國書傳謂在宜陽之西既未協洛水導源之義而胡渭禹貢錐指亦以在商州者當之然州西熊耳乃丹水所歷而非洛水所經與禹貢寔不相涉惟洛南亦即漢上洛縣境且準其地望與漢志熊耳山在東北之文適合洛水至是始大其為禹施功之處無疑又按一統志以禹貢熊耳山

載之盧氏縣今從陝西通志并列入雒南

茶臼山在雒南縣東三十里通志一名茶山山巔石齧
齒齒有臼二三可受水數升口圓底剝受杵處光潔澤
滑相傳仙人搗茶處

大聖山在雒南縣東八十里通志山上有龍王廟廟前
有聖水泉懸崖飛瀑旱禱輒應又謂之靈峪泉其水入
洛故洛水經此謂之靈峪河縣志洛水經其下相傳古
神龜負圖授禹於此

玉虛洞在雒南縣東北三十里一統志深五里許可容千餘人中多石乳奇狀百端有水積為池池中石皆成

蓮花形

已上
雒南

蓮花山在山陽縣北五里通志縣之主山形如蓮瓣蜿蜒起伏而西昂一首曰蒼龍山又曰豐山

龍首山在山陽縣東南通志脉自翠屏山來望之如龍首山下有泉入豐河又翠屏山在縣南三里勢如屏列山北有湘子洞內有石竇四時不涸

仙人龕在山陽縣西北五里通志宋邵雍僑寓旬月龕有勒石

三鳳山在山陽縣西百三十里縣志中有七十二洞又有仙人崖蒼壁數百仞壁間曾有人錘鑿樵者見之呼曰爾仙人耶其人即化為石

大山在山陽縣西南九十里通志峰巒高聳甲於諸山其西有惠家洞前後有門門高五丈寬十餘丈可容三四十家東有楊仙洞一名楊善洞昔人避寇處

七里硤在山陽縣西南百餘里通志東西兩山壁立相向如揖不合者僅尺餘仰望青天如一綫非亭午不見日其中一溪南瀉水聲如雷

天柱山在山陽縣東南八十里隋書上津縣有天柱山

謹按上津縣今屬湖北鄖西界

太平寰宇記一名牛山在上津縣北五

十里段成式名山記上津天柱山絕巖壁立秀出衆嶺有穴名遊仙洞洞口有竹數莖寒風凜然人不敢入西

安府志一名天竺山唐羅公遠宋邵雍皆隱於此

已上小陽

龍山在商南縣東北一里通志蜿蜒高聳狀如龍盤與
虎山對峙虎山在縣西一里蹲踞如虎

青山在商南縣東南四十里通志道通荆襄又筆峰山
在青山之右壁立萬仞形銳如筆發脉於用山疊嶂層
巒望之甚秀

用山在商南縣東北四十里通志發脉終南旁連秦嶺
雙峰峻聳漢用里先生隱處

已上
商南

大川

商州牧護關水在州西百二十里州志源出秦嶺西流入藍田界即霸水上源

金井水在商州西南通志即甲水源出秦嶺流入鎮安界漢書地理志上洛縣甲水出秦嶺山東南至錫入沔過郡三行五百七十里

謹按錫縣今屬白河界

水經注甲水出秦

嶺東南流逕金井城

色河在商州西南五十里通志源出安武山名安武水又名關柵色河南流入山陽界水經注水出上洛陽亭

縣北青泥西山南流逕陽亭聚西俗謂之平陽水南合

豐鄉川水又南入上津注甲水

謹按安武山即青泥西山陽亭廢縣在山陽縣

北西

丹水在商州南一里通志源出州西北秦嶺東南入商
南界水經注丹水出上洛縣冢嶺山東南流與清池水
合又東南過其縣南楚水注之又東歷菟和山又東南
過商縣南又東南歷少習出武關又東南流入白口歷
其戍下又東南浙水注之唐書崔湜傳湜建言山南可

引丹水通漕至商州自商鑱山出石門北抵藍田可通
輓道州志丹水出秦嶺之息邪澗亦曰州河又東南流
三十里逕大商原曰大商原河又東南三十里逕麻澗
曰麻澗河在熊耳峰下山澗環抱厥地宜麻又東南十
里逕仙娥峰曰仙娥涇一名西巖涇水南有桃花涇唐
李白白居易曾泛舟賦詩於此又東南逕州東四十里
至白楊店曰白楊河又東十里曰洛源河又東十里曰
高橋河又東十里曰棣花河凡二百七十里入商南界

又有月兒潭在州東百十五里崔湜謂可通輓輸即此
水中舊有巨石難通舟楫名月兒灘明萬曆中丹水暴
漲沙壅灘平水道便之

宋王禹偁別丹水詩曾經爛漫濯吾纓忍別潺湲月夜聲便入

紅塵染詩意吟
魂猶合數年清

水道河在商州西二十里通志即清池水水經注東北
出清池山西南流入丹水州志州北荆水有二源南流
合為一東南逕州西北之上板橋與泉水合謂之水道
河泉水在州北七十里源出泉村聚其水逕聚北馬角

輞峪至上板橋合荆水

乳水在商州南五里通志即楚水又名南秦川秦一作
靜水經注楚水出上洛縣西南楚山其水兩源合舍於
四皓廟東又東逕高車嶺南翼帶衆流北轉入丹水魏
書地形志上洛縣有南秦水王禹偁集南靜川在商州
之南二三里平如掌居人百餘家秋來一川紅葉又有
小桃細竹夾水而生州志楚水源出秦望山其色如乳
自黃龍廟口至土門其渡凡七名七渡河又東經南秦

嶺下名南秦川又東北至三台山東入於丹水又有楚水在州南五里源出楚山北流入乳水蓋楚水別源也水經注楚水有二源此其東源也

宋王禹偁春遊南靜川詩南過高車嶺川

原似掌平峯巒間畫障映畎列棋枰帝女柔桑綠王孫野草生提壺催我醉戴勝勸人耕商嶺堪攜履丹河可濯纓蓋圓松影密鞭亂行根擗勃勃畬田氣磷磷水磴聲野桃誰是主山鳥不知名欲舞寧無蝶思歌亦有鶯官閒春日永擔酒此中行

大峪河在商州東九里通志即商洛川在商洛鎮南北流入丹水太平寰宇記商洛川在商洛縣東南八里

龍駒寨河在商州東百里通志一名背峪河南流入丹水襄漢舟楫皆集於此其南為百頃潭

武關河在商州東百八十里通志東流至商南畢家灣入丹水

鹿池在商州東百十八里通志去月兒潭三里傳有白鹿飲此水見人化去

花園泉在商州城內西南隅通志郡人治以為園種蓮養魚遊釣其中又鑿渠由東而南出水門入州河又五

龍泉在西關龍王廟前泉水迸湧其味清甘或以為與江南惠泉相似又以禱雨有應立碑號甘雨泉

泉山泉在商州西北泉村集通志泉山有泉二十餘處最佳者三一在上寺西麓一在玉皇廟後一在寇家村此泉尤奇石上一竇天成可容三四斗其水常滿既供取汲餘猶瀉注大河且味甘美權之重於他水泉村之得名以此

丹水渠通志丹水經流州境二百里兩岸隨地皆可開

渠但水性泛漲每歲旋衝旋築約灌田千餘畝

已上商州

遲河在鎮安縣西南百八十里通志一名東池河即直水

下流入石泉界

詳見石泉

洵河在鎮安縣西南七十里通志自長安界入境又流

入洵陽界隋書地理志豐陽縣有洵水

謹按縣在隋屬豐陽地

長

安志洵河在乾佑縣西南百里出萬年長安兩縣界秦

嶺下東南流入洵陽縣

謹按萬年縣今屬咸寧

縣志源出長安縣

界至盧家寺入縣境流至洵陽之兩河關與乾祐河合

互見洵
陽縣

乾祐河在鎮安縣東三里通志即柞水一作沓以舊縣
名水經注柞水西出柞溪南流逕重崖堡西長安志沓
水在乾祐縣東五里出萬年縣界秦嶺下流入洵陽又
蘊水在乾祐縣西南七里出考山下流入沓河縣志乾
祐河源出咸寧界秦嶺至舊縣關入縣境至洵陽之兩
河關合洵水又有溫水河在縣西北九十里即蘊水也
東南流入乾祐河

鎮安河在鎮安縣城南通志俗名縣河源出西王峪逕雲蓋寺名雲蓋川東南流入乾祐河

金井河在鎮安縣東北一百十里通志自商州流入縣境又東南入山陽界水經注甲水流歷金井城南又東南經上庸郡北與關柵水合隋書地理志豐陽縣有甲水縣志亦名合河一名安樂川源出咸寧豐家河至孟李寨入縣境經柴家寨至山陽與葛河合

花水河在鎮安縣東南九十里通志有石磴數十級水

激浪湧如花東流注於山陽之合河

已上
鎮安

洛水在雒南縣北五里通志源出秦嶺東流逕熊耳山
入河南盧氏縣界書禹貢導洛自熊耳山海經謹舉之
山洛水出焉而流注於元扈之水漢書地理志禹貢雒
水出冢嶺山東北至鞏入河過郡二行千七十里水經
注洛水出上洛縣謹舉山東與丹水合又東尸水注之
又東得乳水又東會龍餘之水又東至陽虛山合元扈
之水又東歷清池山傍合武里水又東門水出焉又東

要水入焉又東與獲水合

謹按門水及獲水今無考

又東逕熊耳山

東北過盧氏縣南太平寰宇記洛水在縣北一里縣志

洛河源出洛水泉在縣西一百里秦嶺下東注彎環百

折盡邑境之東西蓋州境之山皆起於秦嶺及中幹山

而兩山之水皆起於洛河縣冊洛河出洛水泉屬渭南

境流五里入縣界又東南受元扈石門諸水流三百二

十里出境

謹按今亦謂之南維水以別於源出慶陽白於山之洛水洛字作雒魚豢典略云漢火行

忌水故去水加佳

地畫岔水在雒南縣西北百餘里通志源出渭南界合於洛又有階峪川源出金堆城逕蔣家溝入洛又有構峪川南流至保安村入洛山海經竹山之陽丹水出焉東南流注於洛水經注丹水出西北竹山注於洛又尸水北出發尸山乳水北出良餘山皆南流入洛又龍餘水出蠱尾之山東流入洛

臣謹按水經注此條在洛水篇別是一丹水非商州至浙入鈞之丹水而地畫岔諸水疑即此丹水及尸

乳龍餘諸水矣詳閱桑鄺經注兩丹水源流迴別本
自分明惟商州丹水出秦嶺昌黎祠下之第九山息
邪澗舊志亦稱竹山而兩丹水之源遂混又維南丹
水所出之竹山今亦僅存名目未能指實雍勝略謂
在商州西北二百里準其地望當在華州渭南商州
維南四州縣之交而渭南有山名箭峪其陰為大赤
水所出考太平寰宇記竹水南出竹山亦曰大赤水
又名箭谷水然則竹山即箭谷無疑丹水乃出其陽

耳通志亦疑為箭谷而未有明證今詳著之

黑潭水在雒南縣西八十里山海經陽虛之山臨於元
扈之水是謂洛汭水經注元扈之水出於元扈之山盖
山水兼受其目縣志元扈水出元扈山之陰今名黑潭
子東北流入洛其入洛處當陽虛山南

石門川在雒南縣北十八里通志即魚難水太平寰宇
記魚難山有撲水崖高五十丈魚不能過故又曰魚難
水經石門入洛西安府志石門川源出黃龍山合麻坪

川水南注於洛縣志石門在縣北十里石門麻坪二水
會流處石山突起中闢一門高廣各五六丈二水合流
其中亦號為龍門

縣河在雒南縣南二百步通志即武里水水經注洛水
東歷清池山旁合武里水其水南出武里山東北流注
於洛太平寰宇記里清川謂之清池川蓋以水在清池
山旁名也

謹按此清池川入洛非
商州入丹水之清池水

故縣川在雒南縣東南四十里通志即要水水經注要

水南出三要山東北逕拒陽城西而東北流入於洛

謹按

拒陽故城在縣東南

縣志源出三要山源遠水濶東流而北折經

故縣治因名又北逕縣東南五十里之頁山下繞迴西

入於洛

已上維南

金井河在山陽縣西南七十里通志自鎮安界流入又

東南入湖廣鄖西界漢書地理志上洛甲水東南至錫

入沔

謹按上洛今屬商州錫縣今屬鄖西白河界

水經注甲水自逕金井城

南又東逕上庸郡北與關柎水合又東南逕魏興郡之

洵陽南又東右入漢水

謹按魏上庸郡治豐陽屬今縣境

隋書地理志

豐陽縣有甲水

謹按豐陽故城在縣南

通志甲河以甲於諸水而

名舊云夾河非是西安府志金井河一名金津河商州

志一名合河以衆水所會而名又東南流逕縣南百二

十里南入湖廣舊上津縣境凡三百八十里至甲河關

入漢縣志自鎮安柴家莊東來合花水諸河至董家溝

合於豐水又花水河在縣西南百里自鎮安境白石崖

東來流入合河

色河在山陽縣西三十里通志自商州來南流與豐水
合水經注關柎水自青泥西山南經陽亭聚西俗謂之
平陽水南合豐鄉川水又南入上津注甲水

謹按陽亭聚在今縣

北今二水相合在縣境則合處亦舊屬上津地也

縣志關柎色河其上源曰安

武水又名下關坊河西流至石碓合於豐河

縣河在山陽縣南通志即豐陽川一名豐鄉川又名豐
河水經注豐陽川水出豐鄉東山西南流經豐鄉故城
南又西合關柎水縣志縣河發源於縣東二十里圈嶺

西流逕縣城南又西流合色河折而南入合河又南至
甲河關入漢

丹水在山陽縣東百五十里與商南接界通志一名兩
河自州東入縣境至竹林關與銀花水合又銀花河在
縣東八十里源出圈嶺

已上山陽

丹水在商南縣西四十里商州志即今之兩河水自州
境來逕縣西南一百里曰上兩河合銀花河水又東復
逕縣南四十里曰下兩河與沫河商河合又東南入浙

川界又沐河一名縣河在縣東門外發源盧氏縣之界
嶺南流入縣境西南入兩河又商河在縣西南八十里
東流入兩河

清油河在商南縣西三十里通志源出雒南花障坪自
西北入境納武關以東之水南流逕縣西而入丹水

花字潭在商南縣西南百三十里縣志有三潭相連俱
在石上每潭周十餘丈兩旁懸崖下瞰形勢甚險亦名
風雨雷潭俗傳至其地者不敬則雷聲隱隱潭水隨溢

已上

商南

古蹟 第宅

商州唐洛源監一統志在商州東五十里孝野崖唐書
地理志商州有洛源監錢官

迎翠樓一統志在商州東商洛故城內唐時建

宋阜民監一統志在雒南縣東南四十里宋史食貨志
仁宗採雒南紅崖山號州青水冶青銅置阜民朱陽二
監元豐九域志上洛縣有阜民錢監又有龍渦鎮北二

銀塲按朱陽監在河南陝州

西暉亭商州志在州西十里宋團練副使王禹偁建禹
偁詩有西暉亭下峰巒碧南靜川中木葉紅之句遺址
猶存

卧牛臺商州志在州西北鳳凰原上邵雍寓商州時州
守延賞牡丹時章惇為商洛令議論縱橫不知敬雍雍
言見蓓蕾而知花之高下者知花之次也見根葉而知
花之高下者知花之上也如公所言知花之次耳因陳

天人理數之學惇始愧服

古蹟

祠宇

上古蒼頡廟一統志在商州城北商山書院後

唐虞契廟一統志在商州東九十里

漢四皓廟一統志在商州西金雞原一在州東商洛鎮
後魏雙烈祠商州志在州治西祀北魏孝武時洛州刺史郭琰泉公

唐裴晉公祠一統志在商州東八里祀裴度

韓文公祠一統志在商州西秦嶺上祀韓愈

大雲寺一統志在商州治西唐建舊名西巖院元至正中更名

西巖寺一統志在商州西八里仙娥峰麓唐建

雲蓋寺一統志在鎮安縣西北四十里雲蓋嶺唐建殿宇宏麗遺址猶存明正統中重修

黃龍寺一統志在雒南縣西四十五里相傳唐黃龍禪師駐錫處

明原尚書祠一統志在商南縣西祀原傑

古蹟 郊邑

周蒼野聚一統志在州東南左傳楚師軍於蒼野杜注
蒼野在上洛縣水經注丹水自蒼野東歷菟和山按蒼
野在菟和山西舊志謂在州南一百六十里誤

武關通志在商州東一百八十五里左傳楚司馬販使
謂晉陰地大夫曰將通於少習以聽命杜注少習秦商
縣武關也戰國策蘇秦說楚威王曰秦一軍出武關一

軍下黔中則鄢郢動矣漢書高帝紀沛公攻武關應劭
曰武關秦南關也通南陽郡京相璠曰武關楚通上雒
扼道也水經注丹水歷少習出武關洛書甄曜度武關
山為地門上應天齊星柳宗元館驛使記自霸而南至
於藍田其驛六其蔽曰商州其關曰武關州志在州東
武關山下當官道設關北接高山南臨絕澗去河南內
鄉縣一百七十里明洪武中以兵守之後設巡檢司今

廢

唐李涉再宿武關詩遠別秦城萬里遊亂山高下出
商州關門不鎖寒溪水一夜潺湲送客愁宋胡宿過

武關詩津亭歌闋戒棠舟五兩風來不暫留西北浮雲
連魏闕東南初日滿秦樓層城渺渺人傷別芳草萋萋
客倦遊平樂舊歡收不
得更飛夢到瀛洲

漢王陵故城一統志在州南水經注丹水逕一故城南
名曰三戶城昔漢祖入關王陵起兵丹水以歸漢祖此
城疑陵所築也括地志王陵故城在上洛縣南三十一
里州志今縣西南四十里軍嶺下地名秦王城或謂即
王陵之譌

漢王城一統志在商南縣東十里俗傳光武屯軍於此

四皓墓通志在商州西三里有四塚塚前有廟廟中有

古今碑刻又商洛舊縣西亦有四皓塚

謹按十六國春秋前涼張重華

云長安有四皓墓考文章緣起云惠帝為之立碑商山則葬長安之說誤也但今商州四皓墓有二一在州西三里一在州東八十里商州鎮西未知孰是唐李白過四皓墓詩我行至商洛幽獨訪神仙園綺復安在雲蘿尚宛然荒涼千古跡蕪沒四墳連伊昔鍊金鼎何年閉玉泉隴寒惟有月松古漸無烟木魅風號去山精雨嘯旋紫芝高咏罷青史舊名傳今日併如此哀哉信可憐

唐偏路隘通志在商州西北十里唐書地理志貞元七年商州刺史李西華自藍田至內鄉開新道七百餘里

迴山取途人不病涉謂之偏路輿程記自武關西北行
四百餘里至藍田縣皆行山中即所謂偏路也至藍田
始出險就平州志又自說法洞至石佛灣明嘉靖萬歷
間商洛道郝元洪知州王邦俊相繼修葺鑿壁架梁砌

石連棧至今利賴

唐李商隱商于新開路詩六百商于路崎嶇古共聞蜂房春欲暮虎窠日

初曛路向泉間辨人從樹杪分更誰開捷徑速擬上青雲又商于詩商于朝雨霽歸路有秋光背塢猿收果投巖廟退香建瓴真得勢橫戟豈能當割地張儀詐謀身綺季長清渠川外月黃葉廟前霜今日看雲意依依入

鄉帝

板橋通志在商州北四十里跨荆水上溫庭筠詩人跡
板橋霜即此

韋善俊墓通志在雒南縣西南二十里藥子嶺

宋乾祐關縣志今名舊縣關宋置在鎮安縣北九十五
里又青鳳關俗名青銅關在縣南七十五里接洵陽縣
界輿地紀勝云洵陽縣有青鳳關即此關也西安府志
謂之青風關

金商洛鎮通志在商州東八十五里金史地理志商洛

縣貞元二年廢為鎮

謹按即隋故商洛縣

黃川鎮通志在商州西七十里金史地理志商州舊有

黃川鎮

明收護關一統志在商州西一百二十里與西安府藍田縣接界或謚為模糊關又謚為莫護關有南北二關明設秦嶺巡司於此今廢

龍駒寨一統志在州東一百里有東西二寨據雞冠山俗傳項羽烏騅產此故名其地水趨襄漢陸入關輔南

北輻輳一巨鎮也

盧靈關一統志在洛南縣東北一百十五里路通河南
盧氏靈寶二縣關之西有黃龕舊傳河中有金關之東
有石室宏敞名五仙窰

三要鎮一統志在雒南縣東南九十里三要山下明成
化七年置巡司於此

竹林關一統志在山陽縣東一百三十里臨丹水自此
登舟經浙川穀城至小江口入漢為下襄陽水路明成

化十三年置巡司今裁

豐陽關一統志在山陽縣東南一百二十里即故漫川縣明洪武初置巡司於豐陽鎮成化十三年移駐於此仍名豐陽巡司今裁通志晉永和九年秦苻雄遣苻菁略上洛立荊州於豐陽川即今豐陽關

永安寨一統志在商南縣西十里

本朝康熙初縣嘗僑置於此

關中勝蹟圖志卷二十五